

ULLOQ 12.09.2022

UKA2022/30/78/89

(UPA2022/30: Meeqqat ADHD-mik aamma autisme-mik nappaateqartut siusinnerusukkut paasineqartarnissaannut qanoq pitsanngorsaasoqarsinnaaneranut pilersaarummik Naalakkersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut. (Inatsisartunut ilaasortaq Mikivsuk Thomassen, Inuit Ataqtigiit)

UPA2022/78: Meeqqanut ikiorsiinerit pigasuartuunngitsut timikkut aammalu tarnip pissusaat pillugu immikkoortortaqarfimmut innersuunneqarnermiit annerpaamik qaammat ataaseq ingerlasimanissaanik anguniagalimmik innersuussinissaq kisitsisilersuinissarlu siunertaralugu tarnip pissusaa pillugu aammalu meeqqat timikkut nakorsiartarfianneersunik sukkasuumik suligasuartussanik suleqatigiissitaliornissamik Naalakkersuisut pilersitsinissaat siunertaralugu Inatsisartut aalajangiiffigisassaattut siunnersuut. Suleqatigiissitap taamatuttaaq aningaasatigut sulisutigullu pisariaqartitat ersarissassavaat. Suleqatigiissitap innersuussassat kisitsinerillu

UPA 2023 nallertinnagu naammassisimassavaat.. (Inatsisartunut Ilaasortaq Anna Wangenheim, Demokraatit) UPA2022/89: Meeqqat ADHD-eqartut, ADD-eertut, autismeqartut aammalu/imaluunniit angstertut suussusersineqarnissaat taamaasillutalu ikiorsinnaanissaat qanoq pikkoriffiginerulersinnaaneranut tigussaasunik innersuussuteqartussanik suleqatingiinnik immikkut ilisimasalinnik pilersinnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Suleqatingiit immikkut ilisimasallit innersuussutit 1. juni 2023 nallertinnagu saqqummiutissavai. (Inatsisartunut Ilaasortaq Nivi Olsen, Demokraatit)Siunnersuuteqartoq, soorlu: Aningaasaqarnermut akileraartarnermullu naalakkersuisoq)

Oqaluserissassat: 30/78/89, Siullermeerinninnermi siunnersuutit Siumumit ima oqaaseqarfigissavarput.

Siumup siunertariuarsimavaa, inuaqatigiit ineriartorneranni meeqqat suliniarfigineqartuarnissaat. Ullumikkummi meeqqanut assigiinngitsunik toqqaannaq ersinngikkaluartunik inuunerluuteqarsinnaanerit ilisimalersimavarput. Siunnersuuteqartunullu pingasunut – Demokratineersumut Nivi Olsenimut, Inuit Ataqtigiinneersumut Mikivsuk Thomassenimut aamma Demokratineersumut Anna Wangenheimimut – Naalakkersuisut tunngaviumik paasinnillutik akissuteqarsimanerannut qujarusuppunga.

Uani suliami Siumumit Timersornikkut Naalakkersuisoq ataatsimeersuartitsineranni upernaag peqataasimavugut, tassanilu qulequtarineqarpoq toqqaannaq ersinngitsumik nappatillit qanoq atugassaqarnerat. Annertunerpaamik paasineqarpoq inuiaqatigiit, sullineqarneranut ersarisaassuteqartoqarnissaa Naalakkersuinikkut eqqartorneqarluni. Uani saqqummiinermi



takutinneqarpoq ADHD aamma ADD, aammalu Autisme paasiaarneqartannginneranut peqqutaaqataasoq. Suli nunatsinni apeqqummut akunnitsinni ilisimasat annikinnerat pissutaasoq paasinarpoq. Kisianni ukiuni kingullerni takussaangitsumik nappaatit annerusumik suliniarfigineqannginnerat allanngortinneqartariaqartoq Siumut isumaqarpoq.

Isumasioqatigiinnermi inuusuttuarannguaq Ilimmarfimmi qaffasinnerusumi TILIOQ suleqatigalugu tapersorsorneqarluni ilinniartooq naammattoorparput. Tassani paasivarput nakorsaatit atulersinneqarneratigut nappaamminik aqutsisinnaalersimanerminik - ilami aallaat ilinniarnerninik aallussilluarnerninik saqqummiisoq tusarnaarparput. Nukittuallannarpoq tusaallugu, nappaat suussuserneqarsinnaappat, inuuneq ajunngitsumik angusaqarfiusumillu atorneqarsinnaanngortartoq – isumagalugu naapertorlugu taannaavoq siunnersuuteqartut angorusutaat. Tamanna Siumumit tapersorsorparput.

Naalakkersuisut siunnersuuteqartunut siunnersuutaanut allannguutissatut siunnersuuteqarsimapput. Taakku siunnersuuteqartut siunertaanut tunngaviusumik allannguinngimmata, Simumiit taperserparput.

Taamak oqaaseqarluta ataatsimiititaliamut susassaqartumut siunnersuutit suliarineqarnissaat innersuupparput.

Dines Mikaelen, Siumut